

# **PRAVILNIK O POVRATU NAKNADE PLATE ZA VRIJEME PRIVREMENE SPRIJEČENOSTI ZA RAD NA TERET SREDSTAVA ZAVODA ZDRAVSTVENOG OSIGURANJA HERCEGOVAČKO-NERETVANSKOG KANTONA/ŽUPANIJE\***

(“Službene novine HNK”, broj 5/26)

## **I Opće odredbe**

### **Član 1.**

Ovim Pravilnikom se utvrđuju uslovi, način i postupak ostvarivanja prava na naknadu plate za vrijeme privremene spriječenosti za rad zbog bolesti ili povrede kada se ta naknada isplaćuje na teret sredstava obaveznog zdravstvenog osiguranja, visina naknade plate, najviši i najniži iznos naknade plate koja se isplaćuje na teret sredstava Zavoda zdravstvenog osiguranja Hercegovačko-neretvanskog kantona/županije (u daljem tekstu: Zavod) i način utvrđivanja valorizacije osnovice za naknadu plate.

### **Član 2.**

Pravo na naknadu plate za vrijeme privremene spriječenosti za rad ostvaruje se ukoliko je privremena spriječenost za rad utvrđena pod uslovima i na način propisan važećim Zakonom o zdravstvenom osiguranju F BiH (u daljem tekstu: Zakon), važećim Pravilnikom o postupku i kriterijima za utvrđivanje privremene spriječenosti za rad osiguranika, kao i odredbama ovog Pravilnika.

## **II Uslovi, način, postupak ostvarivanja prava na naknadu plate i rokovi za podnošenje zahtjeva za povrat**

### **Član 3.**

(1) Osnovicu za naknadu plate čini plata isplaćena osiguraniku, odnosno bruto plata umanjena za zakonom propisane doprinose iz osnovice i porez na dohodak, koja je isplaćena osiguraniku u mjesecu koji je prethodio mjesecu u kojem je nastupila privremena spriječenost za rad.

(2) Osnovica za obračun naknade plate za vrijeme privremene spriječenosti za rad utvrđuje se kao satna, osim u slučajevima kada je poslodavac za mjesec koji prethodi mjesecu u kojem je nastupila privremena spriječenost za rad izvršio isplatu najniže plate.

(3) Osnovica za povrat naknade plate za osiguranika koji je istovremeno i obveznik uplate doprinosa (samostalne i obrtničke djelatnosti) je osnovica na koju je izvršen obračun i uplata doprinosa za obavezno zdravstveno osiguranje, umanjena za zakonom propisane doprinose iz osnovice, za mjesec koji prethodi mjesecu u kojem je nastupila privremena spriječenost za rad. Osnovice za obračun doprinosa određenih obveznika za svaku kalendarsku godinu utvrđuje i objavljuje Federalno ministarstvo finansija.

(4) Ako u mjesecu koji prethodi mjesecu u kojem je nastupila privremena spriječenost za rad osiguranik nije ostvario platu, kao osnovica za naknadu uzima se prosječna plata na nivou kantona za odgovarajući mjesec.

### **Član 4.**

(1) Utvrđena osnovica iz člana 3. ovog Pravilnika se valorizira ako je osiguranik duže od tri mjeseca neprekidno privremeno spriječen za rad i ako je prosječna plata radnika kod pravnog ili fizičkog lica kod koje je osiguranik uposlen, porasla za više od 5%.

(2) U slučaju iz stava (1) ovog člana, valorizirana naknada plate pripada osiguraniku od prvog dana idućeg mjeseca po isteku tri mjeseca neprekidnog korištenja naknade plate, ako je ispunjen uslov za povećanje naknade.

(3) Ako valorizacija osnovice za naknadu plate nije izvršena u skladu sa stavom (1) ovog člana, zato što je porast plate bio manji od Zakonom propisanog Hercegovačko-neretvanskog kantona postotka, valorizacija će se izvršiti nakon ispunjenja uslova za istu, a nakon proteka perioda od tri mjeseca neprekidnog primanja naknade plate od iste osnovice za naknadu, s tim da tako povećana naknada plate pripada od prvog narednog dana od dana ispunjenja uslova za valorizaciju. Osnovica za naknadu plate se povećava za onoliko postotaka za koliko je porastao prosjek plate, u vremenu trajanja neprekidne privremene spriječenosti za rad osiguranika (korisnika naknade plate), u odnosu na jednako utvrđenu prosječnu platu za prethodno obračunski period.

\* Pravilnik je objavljen u “Službenim novinama HNK”, broj 5/26 od 6. marta 2026. godine, a stupio je na snagu 1. marta 2026. godine.

## **Član 5.**

(1) Naknada plate se obračunava u visini od najmanje 80% osnovice za naknadu plate u slučajevima privremene spriječenosti za rad.

(2) Izuzetno od stava (1) ovog člana naknada plate iznosi 100% od osnovice za naknadu:

- za vrijeme privremene spriječenosti za rad zbog bolesti ili komplikacija prouzročenih trudnoćom ili porođajem;
- za vrijeme privremene spriječenosti za rad zbog transplantacije živog tkiva i organa u korist drugog lica;
- za vrijeme privremene spriječenosti za rad zbog povrede na radu ili oboljenja od profesionalne bolesti.

### **III Najviši i najniži iznos naknade plate na teret sredstava Zavoda**

#### **Član 6.**

Najviši iznos naknade plate za vrijeme privremene spriječenosti za rad na teret sredstava Zavoda, a koji Zavod vraća obvezniku uplate doprinosa odnosno poslodavcu, utvrđuje se prema osnovici iz mjeseca koji prethodi otvaranju privremene spriječenosti za rad uz primjenu satnice navedenog mjeseca, pod uslovom da je poslodavac istu isplatio osiguraniku i u mjesecu za koji se traži naknada.

Najviši iznos naknade plate iz stava 1. ovog člana ne može biti viši od 80% osnovice za naknadu plate u slučajevima privremene spriječenosti za rad osim u slučajevima člana 5. stav 2. ovog Pravilnika.

#### **Član 7.**

(1) Najniži iznos naknade plate za vrijeme privremene spriječenosti za rad na teret sredstava Zavoda, a koji Zavod vraća obvezniku uplate doprinosa odnosno poslodavcu, ne može biti niži od neto plate utvrđene za svaku godinu važećom Odlukom o iznosu najniže plate koju donosi Vlada Federacije Bosne i Hercegovine, pod uslovom da je poslodavac istu isplatio osiguraniku.

(2) Izuzetak od stava (1) ovog člana su plate osiguranika čija je osnovica definirana u članu 3. stav (3) ovog Pravilnika i kada je ista niža od najniže plate iz stava (1) ovog člana.

### **IV Kontrole privremene spriječenosti za rad**

#### **Član 8.**

(1) Pravno odnosno fizičko lice (poslodavac) ostvaruje pravo na povrat naknade plate na teret sredstava Zavoda po osnovu privremene spriječenosti za rad, pod uslovom da redovno uplaćuje doprinose za zdravstveno osiguranje.

(2) Pravo na naknadu plate na teret Zavoda za vrijeme privremene spriječenosti za rad osiguranik ima od dana od kojeg se, u skladu s ovim Pravilnikom i važećim propisima, naknada plate refundira na teret Zavoda i to najduže do navršenih 14 mjeseci neprekidnog trajanja privremene spriječenosti za rad za istu bolest.

#### **Član 9.**

Ukoliko osiguranik radi istovremeno kod više poslodavaca, naknadu plate osiguraniku isplaćuje svaki poslodavac zasebno, s tim kako se osnovica za povrat naknade određuje u odnosu na proporcionalni dio radnog vremena kod svakog poslodavca, uzimajući u obzir propisani najniži i najviši iznos naknade plate koja se refundira na teret sredstava Zavoda.

#### **Član 10.**

(1) Zahtjev za povrat isplaćene naknade plate za vrijeme privremene spriječenosti za rad podnosi poslodavac u nadležni područni ured Zavoda prema mjestu prebivališta osiguranika najkasnije u roku od 45 dana od dana isplate plate za mjesec za koji se traži povrat.

(2) Postupak obrade i kontrole zahtjeva za povrat naknade plate na teret Zavoda za vrijeme privremene spriječenosti za rad uređuje se aktima Upravnog odbora, kao i posebnim internim aktima Zavoda koje donosi direktor Zavoda.

### **V Propisana dokumentacija za povrat naknade plate i formalna, suštinska i medicinska kontrola iste**

#### **Član 11.**

Uz propisani zahtjev za povrat naknade plate (obrazac RB1), podnosilac zahtjeva je obavezan priložiti sljedeću dokumentaciju:

- Originalni obrazac–Izvještaj o privremenoj spriječenosti za rad, potpisan i ovjeren pečatom, Hercegovačko-neretvanskog kantona
- Obrazac NOM ili NOM PLP original, potpisan i ovjeren pečatom,
- Platnu listu osiguranika (original ili kopiju koju ovjerava podnosilac zahtjeva) sa kompletnim podacima za mjesec koji je prethodio mjesecu u kojem je nastupila privremena spriječenost za rad osiguranika, pri čemu se svi podaci koji nisu bitni za obradu zahtjeva mogu anonimizirati,
- Ukoliko osiguranik nije ostvario platu prije nastupanja privremene spriječenosti za rad, dostavlja se posljednji statistički podatak o visini ostvarene prosječne plate u HNK,
- Platnu listu osiguranika (original ili ovjerenu kopiju) sa kompletnim podacima za mjesec za koji se traži

povrat naknade plate,

- Ovjerenu uplatnicu ili isječak izvoda s banke, kao dokaz o izvršenoj isplati plate, osim budžetskih korisnika,
- Obrazac MIP/1023 ili 1024 za mjesec za koji se traži povrat,
- Kopiju potvrde o predaji zahtjeva za ocjenu radne sposobnosti osiguranika Institutu za medicinsko vještačenje, ukoliko je zahtjev upućen od strane izabranog doktora medicine,
- Kopiju Rješenja FZMIO/PIO (s dokazom o datumu prijema rješenja), ili Nalaz, ocjenu i mišljenje Instituta za medicinsko vještačenje zdravstvenog stanja,
- Ukoliko je osiguranik izoliran kao kliconoša ili zbog pojave zaraze treba priložiti Rješenje nadležnog sanitarnog inspektora,
- Kopiju Rješenja o invalidnosti ukoliko se radi o povratu naknade plate nakon 7 dana (Preduzeće za profesionalnu rehabilitaciju i zapošljavanje invalida, odnosno pravno ili fizičko lice, koja upošljava osiguranika s invaliditetom),
- Ovjerena Izjava samostalnog obveznika koji nema zaposlenih radnika, da tokom privremene spriječenosti za rad ne obavlja registrovanu djelatnost,
- Obračun valorizacije i dokaz o valorizaciji.

#### **Član 12.**

Svi zahtjevi za povrat naknade plate na teret Zavoda koji su zaprimljeni, a nisu okončani do dana stupanja na snagu ovog Pravilnika, kao i sve privremene spriječenosti za rad čiji je prvi dan privremene spriječenosti za rad utvrđen prije stupanja na snagu ovog Pravilnika, obradit će se po odredbama propisa koji je bio na snazi do stupanja na snagu ovog Pravilnika.

### **VI Prijelazne i završne odredbe**

#### **Član 13.**

Stupanjem na snagu ovog Pravilnika prestaje važiti Pravilnik o povratu naknade plate za vrijeme privremene spriječenosti za rad na teret Zavoda zdravstvenog osiguranja Hercegovačko– neretvanskog kantona/ županije („Službene novine HNK“, broj: 6/22), Pravilnik o izmjeni Pravilnika o povratu naknade plate za vrijeme privremene spriječenosti za rad na teret Zavoda zdravstvenog osiguranja Hercegovačko – neretvanskog kantona/županije („Službene novine HNK“, broj: 3/25) i Odluka o uslovima i vremenu podnošenja zahtjeva za povrat naknade plate za vrijeme privremene spriječenosti za rad, broj: U.O. – 02-13-2-2-04094/20 od 26.02.2020.godine.

#### **Član 14.**

Ovaj Pravilnik će se objaviti u „Službenim novinama Hercegovačko-neretvanskog kantona“, na web i intranet stranici Zavoda, a stupa na snagu 01.03.2026.godine.